

Mungu na Asifiwe!

Nitautaja wema wa Bwana, sifa za Bwana kwa yote aliyotukirimia Bwana; na wingi wa wema wake kwa nyumba ya Israeli. Isaya-63:7.

Wakati hisia ya wema wa Mungu inapoburudisha roho, daima hudhihirishwa usoni kwa sura ya amani na furaha. Itaonekana katika maneno na matendo. Roho ya Kristo iliyo takatifu, yenye ukarimu, ikifanya kazi juu ya moyo, itatoa katika maisha mvuto unaongoa kwa wengine...

Je, hatuna sababu ya kuzungumzia wema wa Mungu na kueleza nguvu Zake? Marafiki wanapotutendea mema tunaona ni heshima kuwashukuru kwa ajili ya wema wao. Ni kiasi gani zaidi tunapaswa kuhesabu kuwa ni furaha kumrudishia shukrani Rafiki ambaye ametupa kila zawadi njema na iliyo kamilifu. Basi, katika kila kanisa na tukuze shukrani zetu kwa Mungu. Na tuifundishe midomo yetu kumsifu Mungu katika duru ya familia... Hebu zawadi zetu na matoleo yetu yatangaze shukrani zetu kwa neema tunazopokea kila siku. Katika kila jambo tunapaswa kuonesha furaha ya Bwana...

Daudi anasema, "Nampenda Bwana kwa kuwa anaisikiliza Sauti yangu na dua zangu. Kwa maana amenitegea sikio lake, Kwa hiyo nitamwita siku zangu zote." (Zaburi 116:1, 2). Wema wa Mungu katika kusikia na kujibu maombi unatuweka chini ya wajibu mzito wa kuonesha shukrani zetu kwa ajili ya neema tulizopewa. Tunapaswa kumsifu Mungu zaidi ya tunavyofanya. Baraka zilizopokelewa kama jibu la maombi zinapaswa kutambuliwa mara moja...

Tunamhuzunisha Roho wa Kristo kwa mashtaka yetu na manung'uniko na kulalamika. Hatupaswi kumvunjia Mungu heshima kwa masimulizi ya huzuni ya majaribio yanayoonekana kuwa mazito. Majaribu yote yanayopokelewa kama walimu yatasababisha furaha. Maisha yote ya kidini yatakuwa ni yenye kuinua, yenye kuadilisha, yenye kukuza hadhi, yakiwa na harufu nzuri ya maneno na matendo mema.

Amani ya Mungu na itawale ndani ya roho yako. Ndipo utakapokuwa na nguvu za kustahimili mateso yote nawe utafurahi kwamba unayo neema ya kuvumilia. Msifu Bwana; zungumzia wema Wake; elezea nguvu Zake. Fanya angahewa inayozunguka roho yako kuwa tamu... Msifu kwa moyo na roho na sauti, Yeye ambaye ndiye afya ya uso wako, Mwokozi wako na Mungu wako.